



Perbadanan Insurans Deposit Malaysia
Melindungi Simpanan Dan Insurans Anda Di Malaysia

Ringkasan Rancangan Korporat 2026 – 2028

Ringkasan Rancangan Korporat 2026 – 2028

Rancangan Korporat 2026 – 2028: Daripada Kesediaan kepada Daya Tahan

Secara semula jadi, buluh melambangkan daya tahan, dengan keseimbangan antara kekukuhan, kelenturan dan keterkaitan. Setiap bahagian buluh menyumbang kepada keupayaannya yang luar biasa untuk menahan tekanan, menyesuaikan diri dengan perubahan, tumbuh dengan teguh dan padat dengan manfaat.

Daya tahan bermula dengan asas yang kukuh. Kekuatan buluh bermula di bawah tanah. Akarnya membentuk rangkaian yang luas dan saling berhubung, yang mengukuhkan setiap batang buluh melalui kekuatan kolektif. Organisasi yang berdaya tahan menyedari akan kepentingan kesalinghubungan antara kakitangan, sistem, proses dan persekitaran operasinya. Apabila hubungan ini difahami dan diperkukuhkan, seluruh sistem menjadi lebih stabil dan mampu menanggung kejutan. PIDM melangkah ke dekad ketiga dengan asas teguh yang diwujudkan melalui rangka kerja tadbir urus yang mampan, berintegriti, serta pengurusan risiko dan kawalan dalaman yang mantap. Tonggak ini, yang diperkukuh oleh sistem dan proses yang dibangunkan sejak 20 tahun lalu, akan memastikan PIDM kekal berdaya tahan untuk terus mendukung standard terbaik dalam melaksanakan mandat kami.

Daya tahan diperkukuhkan dengan ketangkasan. Apabila angin berubah arah, buluh akan melentur mengikut arah angin tanpa tentangan. Ia akan beralun mengikut kekuatan angin, namun akan kembali menegak sebaik sahaja ribut berlalu. Sebuah organisasi yang berdaya tahan akan menyesuaikan operasinya dengan situasi yang sering berubah, perkembangan landskap luaran dan risiko baharu yang muncul di samping meneruskan matlamat utamanya. Ketangkasan membolehkan organisasi meneruskan prestasinya walaupun dalam keadaan yang sukar diramal. Dalam memenuhi mandat PIDM sebagai pihak berkuasa perlindungan konsumen kewangan dan pihak berkuasa resolusi, kami perlu kekal tangkas dan berupaya menyesuaikan operasi dengan keadaan yang sentiasa berubah sambil memastikan tindak balas kami adalah selaras, tepat pada masanya dan berhemah.

Daya tahan memacu ke hadapan. Buluh bukan sekadar mampu bertahan – setelah ribut berlalu, ia bingkas menegak semula, malahan tumbuh dengan lebih kuat, menjadikan cabaran sebagai pemangkin untuk kembali teguh. Sebuah organisasi yang berdaya tahan sentiasa belajar daripada gangguan, serta mempertingkatkan keupayaan dan sistemnya untuk maju ke hadapan dengan penuh keyakinan. Memandangkan persekitaran operasi menjadi semakin tidak menentu dan kompleks, adalah penting bagi PIDM untuk memastikan tahap kesediaan dan persediaan yang lebih kukuh agar dapat bertindak dengan jelas dan yakin serta kekal berdaya tahan.

Di PIDM, kami komited meneruskan matlamat kami sambil menyesuaikan operasi dengan perubahan sekeliling. Teguh bertahan, tangkas mendepani cabaran dan terus mara ke hadapan – buluh menjadi simbol bagi organisasi berdaya tahan yang kami aspirasikan.

Rancangan Korporat PIDM 2026 – 2028, bertemakan “Daripada Kesediaan kepada Daya Tahan”, menandakan satu lagi lembaran baharu selepas 20 tahun beroperasi. Peralihan daripada memastikan kesediaan kepada membina daya tahan mencerminkan keupayaan kami untuk mengharungi ketidakpastian dengan penuh yakin, menangani kerumitan dengan jelas, dan memimpin organisasi untuk mencapai matlamat yang disasarkan. Ia menggambarkan komitmen PIDM untuk kekal teguh, anjal dan progresif dalam persekitaran yang menuntut ketangkasan dan iltizam – berdaya tahan menangani cabaran di samping memastikan kesinambungan operasi. Daya tahan dalam konteks PIDM adalah untuk mempertimbangkan hubung kait, kadar perubahan dan keupayaan organisasi secara holistik untuk terus melaksanakan mandat tanpa gangguan terhadap fungsi kami dalam persekitaran yang sentiasa berubah.

Rancangan Korporat 2026 – 2028 berlandaskan empat keutamaan strategik, disokong oleh pemangkin tadbir urus dan operasi, serta 13 rancangan dan inisiatif korporat untuk menangani risiko dan perkara-perkara material yang dikenal pasti.



Berikut adalah sorotan sasaran hasil strategik yang akan dicapai menjelang akhir tahun 2028.

Keutamaan Strategik 1: Daya Tahan Resolusi ***Daripada keupayaan kepada kredibiliti***

PIDM akan meningkatkan kesediaan kepada daya tahan resolusi, suatu peralihan penting daripada sekadar kesediaan kepada pelaksanaan tindakan resolusi yang berwibawa dalam apa jua keadaan ekonomi, kewangan, teknologi atau geopolitik.

Rancangan	Bajet 2026 (RM juta)	Hasil Strategik menjelang 2028
Resolusi	0.7	Memperkukuh kesediaan resolusi dan meningkatkan kebolehelesaian keseluruhan institusi ahli
Pendanaan	2.3	Ketersediaan pilihan pendanaan kecairan boleh laksana untuk menyokong tindakan resolusi
Resolusi islamik	0.8	Mempertingkatkan persediaan untuk melaksanakan resolusi ke atas institusi kewangan Islam, di samping menjadikan PIDM sebagai peneraju dalam resolusi berlandaskan Syariah
Simulasi	0.9	Memperkukuh kredibiliti dan daya tahan resolusi antara agensi

Bajet inisiatif resolusi dan operasi lain berjumlah RM2.6 juta

Keutamaan Strategik 2: Daya Tahan Perkongsian Strategik dan Hubungan Luar ***Daripada perlindungan kepada pemerksaan***

PIDM akan memanfaatkan secara strategik modal reputasi dan kredibiliti yang telah dibina selama ini untuk menghasilkan impak yang lebih bermakna. Peralihan daripada perlindungan kepada pemerksaan menunjukkan kepercayaan kami bahawa sistem kewangan yang berdaya tahan bermula dengan masyarakat dan pihak berkepentingan strategik yang berkeyakinan dan bermaklumat. PIDM akan terus berfungsi sebagai pihak berkuasa perlindungan konsumer kewangan dan resolusi yang berwibawa, serta menjadi pemangkin kepada usaha pemerksaan kewangan.

Rancangan	Bajet 2026 (RM juta)	Hasil Strategik menjelang 2028
Memperkasa daya tahan kewangan	0.7	Mewujudkan masyarakat yang lebih berdaya tahan dari segi kewangan dan memupuk kepercayaan dan keyakinan yang lebih tinggi terhadap PIDM
Advokasi dan pengaruh pihak berkepentingan	1.1	Memperkukuh modal reputasi dan menjadikan PIDM sebagai rakan strategik yang dipercayai
Penjenamaan PIDM dan komunikasi awam	3.3	Mempertingkatkan keyakinan awam, menambah baik libat urus dengan pihak berkepentingan dan membina daya tahan reputasi

Keutamaan Strategik 3: Daya Tahan Digital ***Daripada transformasi kepada kepelbagaian keupayaan***

PIDM akan memperkukuh keupayaan digital kami, meningkatkan ketangkasan operasi dan mengintegrasikan elemen kecerdasan merentasi sistem dan proses bagi menyokong kesediaan menerajui masa depan. Pendekatan ini memanfaatkan hasil daripada fasa transformasi sebelumnya yang telah meletakkan asas kukuh untuk pelaksanaan strategi yang mampan dan holistik.

Rancangan	Bajet 2026 (RM juta)	Hasil Strategik menjelang 2028
Keselamatan siber	3.4	Meningkatkan tahap kematangan keselamatan siber di samping mengekalkan daya tahan melalui operasi defensif yang efektif
Penggunaan teknologi awan	4.2	Beralih sepenuhnya daripada infrastruktur dan aplikasi di premis kepada teknologi awan
Data dan kecerdasan buatan	1.5	Mempertingkatkan keupayaan analitik dan memperkukuh budaya membuat keputusan berdasarkan data

Bajet inisiatif teknologi maklumat dan operasi lain berjumlah RM3.8 juta

Keutamaan Strategik 4: Daya Tahan Modal Insan

Membina tenaga kerja berdaya tahan, beriltizam dan bersedia menerajui masa depan

PIDM akan terus memperkukuh keupayaan, budaya kerja dan kepimpinan kami bagi memenuhi keperluan organisasi yang sentiasa berubah. Dalam membina tenaga kerja yang berdaya tahan, beriltizam dan bersedia untuk menerajui masa depan, tumpuan utama adalah bagi mempertingkatkan struktur organisasi untuk melonjakkan impak, mencapai ketangkasan melalui keupayaan serta memacu pelibatan dan pengkalan kakitangan.

Rancangan	Bajet 2026 (RM juta)	Hasil Strategik menjelang 2028
Pengukuhan struktur organisasi	0.2	Struktur organisasi yang melonjakkan impak dan memperkukuhkan perancangan tenaga kerja
Pembangunan tenaga kerja	1.6	Menubuhkan ekosistem pembangunan tenaga kerja
Ganjaran keseluruhan yang kompetitif	0.1	Memperkukuh strategi ganjaran keseluruhan

Bajet inisiatif modal insan dan operasi lain berjumlah RM98.2 juta

Secara ringkasnya, keutamaan strategik ini akan menjadi panduan kami dan menyelaraskan usaha kolektif kami sepanjang tempoh perancangan tiga tahun 2026 – 2028. Pemangkin tadbir urus dan operasi dengan bajet RM14.1 juta, akan menyokong penggunaan sumber yang efektif dan optimum dengan matlamat untuk beralih daripada pendekatan yang tertumpu kepada pematuhan, kepada pendekatan berpandukan penilaian risiko strategik. Didorong oleh teknologi, budaya organisasi dan jangkaan yang semakin meningkat terhadap ketelusan dan ketangkasan – aspek tadbir urus, kawalan dalaman dan keberkesanan operasi akan diperkukuhkan bagi memastikan tindakan yang konsisten, efektif dan kebertanggungjawaban merentasi organisasi.


Sorotan Rancangan Kewangan 2026

Rancangan kewangan 2026 memperuntukkan bajet berjumlah RM139.5 juta, yang terdiri daripada perbelanjaan operasi berjumlah RM137.2 juta dan perbelanjaan modal berjumlah RM2.3 juta, yang diselaraskan untuk memastikan sumber digunakan secara optimum bagi menyokong keutamaan strategik.

Pendapatan diunjurkan berjumlah RM1,024.9 juta, terdiri daripada RM717.7 juta hasil premium dan levi¹ daripada institusi ahli dan RM307.2 juta pendapatan pelaburan dan pulangan daripada kesetaraan tunai dan sekuriti pelaburan.

Pendapatan pelaburan dan pulangan daripada kesetaraan tunai dan sekuriti pelaburan dijangka meningkat sederhana berbanding tahun-tahun sebelumnya, mencerminkan kelembapan berterusan keadaan pasaran didorong oleh jangkaan penurunan kadar Rizab Persekutuan Amerika Syarikat dan trend monetari global yang memperlakan. Walaupun berdepan dengan cabaran ini, PIDM akan terus tangkas dalam mengurus portfolio pelaburan, dengan memberi tumpuan kepada strategi untuk mengoptimumkan pulangan sambil mengemudi keadaan makroekonomi yang sentiasa berubah.

Ringkasan rancangan kewangan 2026 kami dinyatakan di bawah.



¹ Kadar premium asas yang disemak semula yang terpakai kepada bank ahli ditetapkan oleh Menteri Kewangan dalam Perintah PIDM (Kadar bagi Premium Pertama dan Premium Tahunan berkenaan dengan Anggota Penerima Deposit) (Pindaan) 2026, yang telah diwartakan pada 2 Januari 2026

PERBADANAN INSURANS DEPOSIT MALAYSIA



1-800-88-1266



info@pidm.gov.my



www.pidm.gov.my

